

仿

潛

齋

詩

鈔

仿潛齋詩鈔卷十二

還臺集

光州 李嘉樂 憲之

丁丑人日家宴

酒出萱闈味更香東風送暖到壺觴稱心家宴逢人日
回首游踪近鬼方信是白華能潔養何煩紫綬促登場
一門歡聚皆春氣便有離愁亦暫忘

上元夕奉太夫人觀鐙

閒官無事可娛親元夜呼鐙趣尚真蟾兔流輝天不夜
魚龍吐氣海爲春千條燭朗齊調玉萬樹花開總爛銀
積雪早融晴色滿繁華世界少紅塵

予宅後面城臨湖環植楊柳城外爲河尤宜遠眺
詩以張之

春色湖光二畝寬
淺黃低拂柳枝寒
敝廬只占尋常景
遠客初歸卻愛看

女牆百雉俯烟波
三兩漁舟唱晚歌
指點五龍宮外路
濃青一片麥田多

城外潢河城裏湖
泉源萬斛湧明珠
春深添箇青帘影
便送樓臺入畫圖

汝南淮北著雙城
冠蓋慵來僻地行
要是天然招隱處
風光雖好不知名

正月二十日辭家北上

故老塞途看驛使我幸還鄉暫棲止度歲恩恩又北行
征夫計日朝

天子既歸豈不願遲遲王事還虞草莽委母知此義促
行期忘卻離愁來眼底往日曉鐙茅屋黯今朝新柳春
風美不知心爲境轉移抑是境隨心奇詭此別當經幾
何年再來又走幾千里官身粗了誓歸田不歸有如潢
溪水

梁蔚御甥

起鳳

送至光山而別因勗以詩

痛念孤兒險備嘗幸逢杵臼得還鄉相期發憤酬高義

瑣尾無忘在鳳翔

甥全家宦歿鳳翔艾齊巷貳尹攜以成立

讀史青年喜貫通
自言獨慕卧龍風
須知相業追伊呂
全在平生淡泊中

羅山道中贈內子

笑倚征裝畫翠蛾
春寒早起筆頻呵
殘鐙試誦新婚別
始信昇平好事多

淮甸西行第一州
大河南北數庚郵
香車初到休嫌遠
十二年閒八度游

生長朱門性率真
荆釵迥異綺羅身
朝官日有齋鹽課
卿善持家我不貧

題信陽州館壁

三宿因緣此地棲，凝澗閣外雨聲齊。
春晴忽覺郵籤速，秉燭牆陰覓舊題。

角子山

申有角子山，蟠踞楚豫間。曲折數百里，江淮爲之環。
窮民私耕闢僻境，易藏姦官兵畏深入。胡能警凶頑，兵至賊姑遁。
賊出兵已班，山險賊所倚。兵懦賊亦嫻，勿謂疥癬疾。滋蔓何日刪，往往道途梗。
甚且驚市闌，果有飛將軍。豈復窮躋攀，監司久卧閣。飛檄方閉關，養癰身亦病。
藥裹扶衰顏，單車若叩壘。賣劍當轉圜。

遂平縣

縣城正月敲鼓鑼懸庭大杖血滂沱鄉民環泣城民歌
城民寥落鄉民多縣官新到忙催科

許州道中

赤地連年旱春田又久晴飢鴉閒啄土瘦馬怯登程人
色枯如腊民心動似旌杞憂殊未已只望長官清

鄭州

適館授餐衣改作愛將鄉士爲王朝輶軒一再斯邦過
采此風詩已寂寥

亢村晤丁少雲大令

乘變舊爲
光州吏目

亢村小驛潔蓬茅令尹親來致酒肴我作秀才君作尉
廿年前憶訂新交

湯陰謁岳廟觀忠武手書墨蹟

昔過公故鄉未謁公家廟升堂展拜像清高酣戰英姿
光四照昔讀公詩篇未見公書法披卷細看墨精神滿
紙雲烟氣翔洽公非行伍是將種誰知作字斂神勇中
興今望並韓劉圓秀先聲開趙董始悟英雄無不可是
真剛健含婀娜運用之妙在一心兵法書法豈相左迂
儒咎公班師急稍緩須與事可集豈知萬世立臣經俯
首金牌死亦得剛柔互濟得其正毫端流露真情性奉

詔卽已懾金人朝廷雖小南風競俎豆馨香筆墨傳後裔永寶人起敬吁嗟乎秦長腳家竊科第片紙僅能書上意子孫詭稱淮海支譜牒灰滅無隻字

採麥苗

深潭龍睡雨不漂平原龜坼地已焦遺民殘喘未絕望春田頗有淺麥苗胡爲女伴攜筐筥拚之拮之手互招一寸苗卽一尺穗得不償失何徒勞老婦未訴先悲哽徐云恃此免腹枵早採豈不知可惜一家微命懸崇朝往歲倉廩高於屋今年子孫散四郊良田賤售無人問生此蕤麥稀如毛得雨尚可薄收刈日至皆熟時迢迢

安能忍飢甘命盡坐待麥飯墳前澆我家有田苗可食
鄰家無田骨已銷我視其衣各整潔富猶如此貧安逃
盛世愛民邁古昔偏災靡不沛恩膏疆吏胡弗早入告
乃令中原民氣凋忽見飛騎道傍過定有封章奏諸

朝嫗言此是催科吏慟倒隴旁驚魂飄我欲慰之苦無
語驅車北去迎寒飈留心再觀大田麥青苗痕雜草蕭
蕭

渡漳河

一水分燕豫頻年出此途迴瀾風力猛照影客心孤車
重嫌沙軟橋平仗土鋪欲尋銅雀瓦臺蹟久荒蕪

游廬生祠

夢後應無夢師前尚有師

前疑祀鍾離及呂祖

人來燕趙地仙洲

漢唐時門外磁州路檻旁
滏水池獨醒原不易策馬更
何之

臨洛關

臨洛關路去年經行潦縱橫
泉水停駐馬再尋艱險處
深溝犁作麥田青

憶幼子

京國雙雛在經年別緒長
明知相見近轉覺未能忘
體小愁嘗藥家貧盼饋糧
靜思消息好磨鍊待身強

柏鄉見杏花

輿簾鎮日積黃塵何處尋芳一問津忽地風沙醒客眼
杏花紅逗驛樓春

過趙順平侯故里

碑在正定府北門內

勇到關張極大觀誰能並世更桓桓一身是膽知名早
羣盜如毛擇主難恒嶽鍾靈應特起蜀都創業惜偏安
樓桑村本相鄰近兩地風雲共鬱蟠

至保定仍宿于清端公祠感賦

清操久慕于公粥再到斯堂愧色多郵傳常供庖有肉
輶軒親見地無禾頌聲遺愛傳三輔待命窮黎徧兩河

欲奉祭儀須半鴨
新祠俎豆幾摩挲

題諫草亭用前韻

下馬看碑碣
荒祠柏樹深
文章推辣手
宰相得甘心
款段終同戮
蚍蛇不用尋
聞風興北學
莫共世浮沈

二月望宿涿州同內子玩月

空庭風定散寒烟
攜手臨階思悄然
百歲休忘今夕景
三春剛半月初圓

月輪照盡客情幽
笑倚新妝動舊愁
我昔飄蓬卿未嫁
隻身四上玉京游

桓侯廟

英豪生涿郡祠祀到今新天意分三國雄材敵萬人屠
酤情耿介刁斗字精神猛將兼儒將斯才果絕倫

樓桑村

鄉閭兒建帝王都涿鹿桑先得氣殊天下英雄霸西蜀
池中雲雨借東吳開疆地限三分國顧命臣安六尺孤
靈爽應無遺恨在曹家疑塚早荒蕪

賣店

漸與都門近回頭謝太行兩年滎客緒一半屬山光聲
聽駝鈴熟書隨雁字忙

寄書都中預備各事

郊關風景好春樹駐

斜陽

內子途中五更卽篝火理裝得以遄行作詩勞之
春宵夢短合歡牀偏是花枝耐曉霜倘使齊眉逢嬾婦
朝朝煩我賦催妝

晏起平生戒性慵同心卿更整晨鐘五馱從此先趨直
他日歸田異惰農

宿良鄉京寓遣人來迎

二子髫齡弱全家旅况難含情愁問訊脫口答平安也
料言無隱何能意遽歡書來不多字翦燭幾回看

二月十七日至都

周道萬餘里經年始克歸忘家投旅館趨

闕肅征衣

復

命前仍服

行裝不得歸私第 夙駕驂仍俟還巢鳥尚飛

東華門外柳迎我又依依

十八日復

命蒙

召見養心殿恭紀

征袍新染

御鑪煙奏對

對微臣

矢志虔

天語從容詢近事

聖懷貫注訖遙邊患銷米賊民情洽化被花搖士氣全

退食細思心愈懍果然萬里卽階前

歸寓

又向匏廬寄舊蹤
塵勞乍息覺春濃
牀前兒白肥如瓠
屋後山青瘦似筠
遠道風霜嬌女問
隔宵酒食小妻供
持家共喜添新婦
高士何妨賃廡春

明遠樓春望

特巡查緝
譯會試場

岑樓高處勢崢嶸
公暇欣然一暢情
黃瓦靈芝
三殿迴紅塵
風煖萬家晴
人歸日下心
方遠春到天
邊眼更明
回望南來郊外路
薊門山色夕陽橫

闈中玩月呈同署監試諸前輩

國家重緝譯
局門試宿學
臺臣立之監
羽林咸受約
分

班夜坐堂寒漸春宵薄遠際一月升素輝朗樓角清玩
殊不厭天宇何清廓玉鏡移座前蟾窟愈開拓起步廣
庭中萬舍燈光灼簾影靜無譁筆聲止還作憶我就試
場釋褐幸縻爵忽忽十五年月色還如昨往歲趨矮檐
今夕敞高閣僕困蹲似鴟吏清立如鶴重此辛苦地熱
淚青衫落丈夫慕功名文字非卓卓文字亦無成吾生
徒飄泊問月月無聲響答棘垣柝

客問差次贖儀戲答

蘭臺蕩節好規模贈縞論交敢自汗亦有木桃歌報玖
斷無蕙苴謗藏珠黃齋煮飯家堪飽紫桂拋箱體未懼

跋涉最遙囊最涇羸將詩卷壯歸途

御史俸滿截取五月初七日

召見記名以繁缺知府用紀

恩述懷有作

初經八十日兩到

九重天曠典榮無比微躬遇偶然私衷欽

聖學

溫諭及親年豈止慈闈幸鄉邦喜共傳

擇人治大郡盛代重循良名荷丹毫記官思白簡揚埋
輪稽故事叱馭貌巖疆經濟書重讀休教舊業荒

夏日周子謙比部招同黃香谷儀曹游十刹海小
飲酒樓觀荷花詩以紀事

周子性雅靜詩人非酒人折柬召我飲韻事何清新都
市火風熱出門泥塗橫惟有十刹海水氣驅炎蒸荷花
三萬柄幽香風露并曩亦過其地積懷殊未申好友招
好景疾去如秋鷹家傳愛蓮說把杯擬快評豈謂六郎
面能銷十丈塵

香谷磊落才世俗目爲怪乃是古狂人直接青藤派周
子獨喜之與我無隆殺三人訂神交聊借詩爲介今晨
思游覽矧可圖晤快入自宣武門飛向清涼界頃刻十

餘里兩車不知億遙遙人北行杲杲日東曬我輩奇興
發炎涼安能敗

入門有笑言王人候已久座上三五賓亦皆熟識友樓
檻俯蓮池藻開數十畝房斂午風低萬枝無一醜壺醞
舊梨花盤進新菱藕射覆想益奇飛觥罰亦偶長安雅
集多此會不常有荷葉蒸豚肩荷塘藏魚筭本地風光
佳無物非悅口落日忽銜山更醉碧筒酒

喜晤吳慶五內弟卽贈

名刺飛來喜欲譁十年離緒滿天涯我愁燕市頻呼酒
君盼河陽一種花

特監運船
當晉爲令

轉粟也能輕測海誅茅相

約早還家滄桑小劫驚都健回首西江日易斜

種竹

種竹頻年竹易枯此君豈可一時無蕭森本異花情性
隨意栽成發幾株

笙堂弟來都喜極有作

作書招弟不肯至家山姑聽慈闈侍突如其來喜且驚
逆料居鄉必有事弟惟含笑強言無予殊不忍窮所諱
觀上國光固自佳藉此團圓尤快意喜聽慈親健如昨
秋成又熟新禾穗庭竹蕭颯涼生頃刻融融作春氣
兒童繞屋呼叔來簾外偷窺復潛避深杯酌酒洗征塵

新紙糊窗書細字骨肉暫離伊可懷此番聚首太容易
人生緣至總相逢何況區區開科第興酣速將筆墨調
三朝卽就春官試

張柳洲布衣

乘先

借來賦贈

一笑看君眼又青論交難得兩忘形素無拘束聯情話
恐有周旋損性靈客裏秋光逢舊雨鄉閒瑣事記零星
况兼餘技工書畫墨彩如雲定滿庭

笙堂考取八旗教習

征轍方停卷已攜寒氎事業不嫌低本無彩筆能干斗
但有青雲願借梯門下絃歌來虎旅榜中際會認鴻泥

公卿收得閒桃李

主試爲崇文山
潘伯寅兩先生

風味依然戀粥齋

與筓堂柳洲遊南下窪諸廢寺

卽此規興廢禪林可慨然佛藏飛鼠穴僧仰賣花錢
金碧昔無價蓬蒿今有緣秋苔埋斷碣剝蝕大明年

秋意

秋樹如高士不蒙市井塵秋花如靜女不趨錦繡春
四時各有態秋氣爽以新天設清超境留慰遲暮人
年來枯簪組疏放愁見嗔願爲花與木一隨秋氣伸

八月晦日紀事

孰矜雲漢善談詩真看周民少子遺赤地苗枯租有額

蒼生命賤樹無皮豺狼當道狐休問鸚鵡能言鳥豈知
泣繪流民圖一幅青天雨露不曾私

重九日後圃漫興同笙堂作

重陽猶未算秋深比較家鄉冷已侵風過白翻槐葉背
霜催黃展菊花心雲含溼氣天將雨樹釀寒聲日半陰
清味與君同領略此身閒處卽山林

詠史

胡椒八百斛種桑八百株同是善儲積此賢彼則愚明
志甘淡泊治生卽廉隅子孫有恒產清風累世俱叔敖
古廉史遺命寢邛區始知狷介士本異封殖徒

與笙堂市樓小飲

登樓莫負掌中杯兄弟他鄉聚幾回
大筆淋漓書酒券
寒花芬馥入羹材食菊花羹
塵侵綠髻頻過市
秋冷黃金舊築臺
忽憶故園雞黍味
稻香村裏賭新醅

庭有豆籬蔓延槐枝上

槐樹低頭接引豆花著力登攀
終被風霜截斷不如兩不交關

送柳洲還光州

噫嘻乎才人身世例坎坷
置向風塵難貼妥
一朝策馬到長安
十萬人中來覓我
我素重君喜延譽
惜與朱門

先相左諸侯上客豈無人文豔如花熱如火君之面目
何寒酸君之肝腸未嫵娜白眼看人人爭避幾似相如
畏廉頗名場觸目皆危機十二碁猶累以卵久居鬱鬱
辭還山男兒豈耐樊籠鎖我既憐君復自憐欲挽征鞭
輒不果布衣書畫重千秋未到千秋誰許可生每飢寒
逼腐儒死方拜奠表蓬顆得名遲速自有時何苦紅塵
受掀簸不如歸卧弋山高擲筆仰看雲萬朵

笙堂考取騰錄喜賦

一階登進比鈔胥拌此閒身作蠶魚豈易邊關投筆去
最難祕府擁城居高文典重看開館吉語聯翩慰倚閭

盛世搜才途自廣寒儒翻幸讀奇書

查甲米入城日一詣朝陽門往返廿餘里車中作
東溟風浪粵西山萬里頻年獨往還見慣宣南城外路
又償途債馬蹄閒

銷磨蹄鐵讓庸材耐冷羊裘去復回一道沙痕一輪月
昏黃影裏照人來

羽林足食密關防應免沙聲半夜量那料褐冠憑粟易
壯哉雀鼠耗官倉

妻孥遲我靜焚膏弟念衝寒煮濁醪休詫我車歸尚速
疲羸腹餒解奔槽

十一月初九日內子生男爲第三子

去年今日合歡杯湯餅冬宵宴又開范蠡少男忘食苦
鮑宣新婦解輕財犀錢奢想三珠樹鳳紀剛周一鏡臺
世事推排成老物箕裘不厭替人來

送黃香谷游上海

落葉禿千樹寒風搖四壁黃子晨叩門惘惘遠行色問
君胡爲然郎曹久沈抑將爲汗漫游揮灑一斗墨君才
古佯狂世途復偪仄何往非人閒難展垂天翼滬濱颯
風橫吳淞江水黑昔爲魚稻鄉今是蠻觸國昨歲過其
旁風帆不肯息君欲往從之我心殊酸惻且復立斯須

門外驅歌急南望海天遙勿爲魑魅得

前歲偕君遊時亦嚴冬景題壁互倚聲投店對酣飲半
月觴詠歡嚇退雪霜冷我歸淮北鄉君躡太華頂逾歲
各還都兒病君爲診使粵我再來泛海君將騁兩箇七
尺軀終年雙輪影征駕不可留何日歸裝整託我書一
車贈君金一餅予季抱別懷走送尤耿耿乾坤此數人
離合無定準破浪早歸來莫負春風緊

十二月初九日條陳豫省賑事奉

旨允行有自係爲認真賑務起見之衷恭賦紀

恩卽以自勵

深識飢寒苦封章歲暮陳蒼生百萬活

丹詔十行新民事關循職

天聽獎認真危言行

聖世感極涕霑巾

搏擊無他見孤寒有

王知觸邪緣識字

布惠慄如絲勵志先求己當官恐愧伊賢聲先業在午

夜惕心期

送笙堂歸光州

北風著力震寒威送汝單車去若飛半載相依偏遽別

九重未報敢同歸讀書時少須勤補就試名成不厭微
莫爲兒童更留戀好斟春酒獻慈闈

壯心冒暑歷星郵踏雪南歸路未休孝友一門承舊業
功名兩字累狂游幾經離聚人將老屢別親朋我亦愁
屈指到家新歲過還防守凍隔黃流

鴉噪童投以石賦此解之

送喜鵲獻諛聞者受弗辭報凶鴉效忠驅逐力不遺鴉
直鵲則佞遭際恒如斯吾謂鴉固忠見事無乃遲凶既
爲之兆雖報將奚裨鴉亦若有言此理豈不知曉啼戒
昏卧勤實福所基烏象代警枕夜夜無倦時

戊寅元旦

太和殿監禮敬賦

鳳紀開元旦，鳩班集眾僚。
遠方齊送喜，稚樂正聞韶。
不倚思中立，御史立文武兩班間無喧靜外朝。
鈞天知己近，景運邁

唐堯

朝儀如此肅，何用叔孫通。
豈尚秋毫察，剛逢曉色融。
金貂輝煖日，仗馬愧春風。

詔下頒恩普，權衡本至公。

東風

東風昨夜徧京華，十丈塵飛九陌車。
偶慰塵勞燒魯酒。

卻憐春色誤唐花生無仙骨拖腸鼠客有爭心畫足蛇
猛憶故鄉溝壑裏雪埋亂骨正如麻

毛煦初冢宰以所著芻獻草見示奉題二律

揮灑軍書暇編排奏議勤

河南辨園
練時輯成

奇文防敵購

庚申
夷警

屢言
戰事

密疏避人焚河朔傳家學准陰勒戰勳一官還一

策此卷首揚芬

亦賦從軍樂

丙辰樂隨
侯陽戎幕

蘭臺踐後塵究心經世學頌首

老成人瀛海關籌畫風霜本性真傳衣意良厚讀罷得
遵循

周紫闌孝廉

文溥

自商城至都餉茶豆二種賦謝

故山喜雨借君傳客夢連宵竟晏然何日采茶兼摘豆
歸借野老話豐年

豐年差幸偏隅好四野何堪赤地荒近日更知鄉味苦
又憑梁肉塞飢腸

近聞河南市人
肉者諱曰梁肉

仿潛齋詩鈔卷十三

守青集

光州 李嘉樂 憲之

戊寅五月初四日奉

命出守青州紀

恩四首

蒲觴料理度良辰一紙除書

御筆新干世幸非前度樹論資還是後來薪心中驚喜
音防誤意外遭逢感倍真清夜自思平日學將何經濟
答楓宸

青齊忽作宦程游表海雄風一大州曲突焦頭饑饉歲

窮檐引領長官謀今從日下乘輅去昨爲河東借筭籌

富弼賑飢遺法在可能敷政亦優優

青州旱災
屢見邸抄

請假頻年返故村衰親從未到都門誰知得侍南陔膳
翻待常開北海尊近地量移如乞郡全家團聚總承

恩一千餘里二千石迎養明春笑語溫

西臺東觀歲華過十六年中閱七科口舌得官齊虜賤
皮毛相士楚狂多酌泉自信清堪厲徙木仍防令易苛

不比搏鵬比涸鮒

聖慈深抵海東波

初六日謝

恩蒙

召見養心殿恭紀

獨對重瞻咫尺威壺中日月總雙輝

召見前月始撤帶領

風光逾

歲榮三接

典試復命御史俸滿至此凡三

召見

天語移時重一麾名注

御屏加敬慎

上年截取記名知府

樹言温室懷幾微小臣從此江

湖遠祇有葵心向

帝畿

食俸米

聖人食特不厭精初非每飯必經營在陳絕糧齊接浙

豈以口腹累天真朱子晦庵尚刻苦日飯脫粟兼饜蜜
斗酒隻雞未爲乏或嘗道學非人情豈知志不恥惡食
飯疏飲水始超倫我任長安近米市廚粒往往白粲勻
今夏偶以祿糈至太倉自昔陳相因或掄或簸都不解
賃舂復恐人竊更姑溉釜鬻食指動聊隨文字飢腸撐
果然無味棄可惜咀嚼不異甌中塵既非含沙工射影
亦非漱石勵齒斷粗難下咽妻子怨骨如在喉僮僕嗔
先生噴飯召與語剛亦不吐勿詭詭我今補外忝天祿
爾俸民脂語書紳倘徇家累膏梁願孰念閭閻溝壑身
誓守平生藜藿腹先以此米相陶甄不隨都尉號搜粟

不待友朋爲指困不侈何曾萬錢筋不屑婁護五侯鯖
吾自有晶羹飯玉糝羹一鍾粟好行其德雙弓米不諱
言貧又何須九飢食五鼎牲饗發有玷縉雲氏屬饜復
貪梗陽人汝輩盍作去年想秦晉齊豫多飢民歲旱羣
餐樹皮盡地坼安望麥苗新倘得飫茲粟一器奚啻餉
以膳八珍啄香爾思效鸚鵡療妒吾將求鶴鷓家衆傾
聽齊捧腹晚炊又可略沾脣

輓袁筱塢侍郎時以督賑歿於汴梁

昭代資良佐中州喪鉅公撫懷知己感志勵大招同生
擅千秋業才標一世雄文章高內翰武略習強弓楚粵

軍興起淮徐寇剽攻省親隨討賊報國必從戎慷慨儒
兼將馳驅孝亦忠陸沈恢版宇水戰埽艨艟幕府奇勳
集都門獨處沖合圍軍氣墨分校榜花紅西北紛回鶻
東南靖鬻熊策專規隴右糧孰饋關中裴度嚴裝出蕭
何餉道通呼庚精擘畫帶甲慶和豐儲積須羊祜聲威
壯馬隆鄰疆羅雀鼠浩劫挽沙蟲十載還朝晚三遷晉
爵崇韜鈴推轂亂兵食耻言功歲計司農座秋官積牘
叢處堂誰賀燕集澤忽哀鴻有

詔催公往無財濟徬窮鄉間徒敬梓溝壑甚飄蓬赤地
逾千里青天籲

兩宮

皇恩頻下逮民困漸消融

帝昇艱難任臣操謹慎衷羣情歸貼妥壹意耐磨礱
貨粟期蘇鮒巡郊戒避驄蹙眉醫疫癘親手拊疲癯憤極
身求代憂深疾染躬毀家施未博抱恨命長終地勢中
原重災年巧宦蒙危疑搖萬舌震悼仰

重瞳史傳旂常炳專祠俎豆充易名昭美諡積謗悔交
訖惠澤長留汴英靈復返嵩定知身化鶴不滅氣如虹
過客傳遺語稱予有士風最難流砥柱猶念纓焦桐箕
尾騎何遽刀頭望竟空諫詞聊紀實此意鑒蒼穹

拜客途遇驟雨

雙輪搖曳似乘舟，竟向天街渡亂流。
水比鞭長及馬腹，雨催雲黑壓人頭。
從茲悟入江湖險，敢望圖將笠屐留。
溼透青衫還自笑，無端避到二陵秋。

連日友人招飲困於酒食賦此解嘲

長安十載餘同志，多良友倚茲文字。
緣訪彼英才，數高軒屢過門。
真氣每驚膈，轉恐顯者來齊大。
非吾偶，或稱勿頸交，或效掩耳走。
只堪竝乞憐，迴異契聞嗾。以此素心同，如駢靳耕耦。
今朝惜別離，治具飲之酒。路使要數人，醉猶留一斗。
早起趨坊西，朝餐輒到酉。夜行轉城東。

暮讌將及丑咀嚼羞雜陳恨吾僅一口拱揖禮欲周惜
吾僅兩手伏雨浸泥塗衣冠苦枷扭輻駒促不嫌屋烏
變良厚大國雖數奔選客亦或苟名紙屢招邀尚不識
誰某灌夫罵難知趙孟辭敢剖勉強往從之談笑顏終
扭胡越馬同槽江河魚共筍此日既班荆異時乃報玖
今豈有秦龍我胡請吠狗其故不易言亦非墮素守三
人必有師一夫不可狃

新僕全集戲筆

踵門紛至乞爲傭覓食窮途恨不農各效小忠希結主
也防大猾巧潛蹤才翰穎士奴休愛俠隱崑崙我未逢

笑看園中花半樹無多春色惹游蜂

謝袁子久觀察贈馬

驢背尋詩味飽諳擬將行李一囊擔馳名已覺輪中駟
贈別偏勞釋左驂備位入騶君可致起家五馬我何堪
鞭絲遙指青州路夏駕毋貽舊友慙

留鬚

丈夫例有鬚如戟匣鏡新開頗自豪撚斷須防詩一字
傳神或借畫三毫章華相禮矜長鬣棧樸呈材尚俊髭
髯果超羣吾亦喜怕人相賞只皮毛

臥室牆倒以出都期近遂不移寓

榻近頽垣下危乎不可留排牆幾一扃築室免重謀待
泛湖中宅如牽岸上舟二分垂趾險差比鍊心儔

留別都中友人

送人作郡羨頻年到我登車轉慨然將去臣心終戀闕
此行衆口說昇仙千秋異政能傳世一語文官不愛錢
磨鍊多時還自忖出山泉即在山泉

名場馳逐卅年身話別長安意倍真日下從今多舊雨
海濱著我僅微塵酒樓月白觥無算詩社鐙紅筆有神
陳迹豈惟經久憶眼前觸念已含辛

累科資俸滯詞曹近改南臺略習勞虎尾春冰防過失

鵝肩火色讓英豪友逢真率方容懶境耐清貧豈作高
錯節盤根今始試贈言望爲勵冰操

春明住久便如家四月淹留始買車淺識偶從班見豹
捷才翻諛足添蛇關情遠別勞攀柳報政重來候及瓜
馬首欲東何日會齊州煙雨夢京華

中秋

行蹤濡滯忽中秋苦雨羈人不自由見慣小庭一輪月
明年看向海西頭

客情懊惱出無車陷淖甯教就道徐我欲乘舟又嫌緩
蒲帆卻羨潞河漁

久雨壞路
雇車不至

牀頭積得俸餘錢五馬猶難去路便愈識空囊窮士苦
不容易著祖生鞭

別匏廬

吾將舍汝去還愛此衡茅初地殊幽谷他年憶舊巢三
層林屋矮兩樹綠槐交官舍雖云好何嘗不繫匏

八月廿四日出都

家具郎當亦十車相攜兒女出蝸廬不輕貸粟方無券
能重行裝尚有書日對西山情已熟程經東海意猶疏
知交走送關懷甚也似離鄉告別初

晚至黃村車折左輪

意輕萬里險如夷不料爻占脫輶危兩鞞猶存誇番御
隻輪竟返勝秦師人皆失色懸車兆我正驚心叱馭時
物理細參三十輻勞薪至此本難支

遲筮堂弟不至而遣傅三及張貴先後到都慰之
積潦橫流闊單車怯首塗猶能添健僕兼得備行廚郭
索爬沙蟹蹒跚浴水鳧奔波殊累汝吾亦感江湖

任邛道中紀事

數月淫霖數千里官道無處無大水我驅我車貿貿來
畏首畏尾身餘幾前途復報行潦橫土人駕舟紛如蠅
舟長八尺車徑丈欲濟先愁波濤委舟子貪利爲我言

創有渡法稍奇詭舟橫僅可受車箱輾慮懸空舟互倚
繫兩轅算維兩舟行則俱行止俱止我少軍威鞭斷流
又乏仙術江折葦公無渡河將奈何姑舍性命聽頤指
十乘果然配合勻一壺自在中流裏蕩漾東低西自昂
拍浮左伏右仍起斷鶴續鳧長短同五雀六燕重輕似
執兩用中物同情缺一不可文駢體布帆無恙欸乃聲
頃刻達岸即可艤事嘗險阻出奇謀途歷艱危悟妙理
曾經滄海目無難不料躡泮技至此數因有耦始有奇
功在任人非任己舍舟登陸策征駒落日沙黃暮烟紫

過河閒見村屋率皆無頂災民咸鬻屋材爲遷徙

費矣感賦

九河故道太紛淆水利奚從闢樂郊野卉已無充腹莧
爨烟并盡蓋頭茅竟因壁立遷新邑誰致門材補舊巢
一樣青州遭歉歲養民何術惠同胞

九月六日冒雨抵濟南

又看細雨釀重陽濟上停蹤客緒忙四境雲山先問禁
一番竿木再登場僦居屋窄如投店涉水車來半溼箱
爲感鄉人迎接意殷殷恐我悴風霜

枕上聞雁寄笙堂弟

江鄉不戀稻梁肥雲路常愁伴侶違月暗霜寒增嫩惡

征鴻總作一行飛

贈同年趙菁衫司馬

名姓纔通意已欣
金門射策舊同羣
一千里外驚逢我
十六年前恨失君
破柱家聲慚學步
倚樓才思信能文
大明湖水清如許
照影剛停北渚雲

自城外夜歸讀郝夢堯太守贈詩賦答并謝

黑夜黃山度莽榛
循塗偏仄返城闈
驚人突兀詩雙牘
照我光輝月一輪
信有奇情歸大雅
不因寡和輟陽春
君家曬腹書多少
偶詠姬媿製亦新

冬夜獨坐

一穗鎿昏正寂寥打窗落葉尚蕭蕭瓶花微凍香還久
爐火新添燄易消讀律自增長夜課移文應受故山嘲
官場難得閒滋味小器何須慕斗筭

贈王香谷布衣

憶我青年日如君感慨多於今甘挫折相對起悲歌貧
賤心方鍊風塵氣不磨王郎哀莫極天奈爾才何

旅食資竭家人嗾余在都不肯借債作詩曉之

英雄不事家人產境雖坎坷意氣遠下此即當善治生
砥廉全賴持躬儉昔年我作京朝官偶向良朋通急緩
沽酒市脯買菜傭篋中一一青錢檢閉戶有時馬食齋

抽絲獨憫蠶成繭竊見同輩尚豪華飲食衣服恣精選
甘將債帥此身當猾商伺機籌遂展爾車來以我賄遷
青蚨子母互流轉他年祿入有餘贏此方囊括彼席卷
操券未焚益責償築臺思避空求免始欣取求不汝瑕
終苦追呼備嘗險迫或貪爲善顧狼否亦貧作喪家犬
我鑒於此窮益堅生平自奉概從貶仰事俯畜本常情
待積餘財償困蹇祿米俸銀皆國恩收債人難嘗一嚮
添丁只許鶴分餐潔己尤慚鴛戀棧長貧倘竟食無餘
指亦未向他鼎染自知窮相廣難封頗覺橫行噲可斬

祀竈日奉飭赴任

七
卷一
天中時節拜絲綸
稷下閒居過十旬
奉檄剛逢虞祭臘
代庖還望魯書春
祀羊於竈終嫌媚
攜鶴之官未算貧
耐到退飛風轉候
依然鷁首挂帆人

喜笙堂弟自光州至

汝賦新婚別衝寒
亦可哀親遲祿養
日我乏宦游才殫
缺愁懷解連牀
笑口開持家辛苦
甚尙挈百金來

己卯元旦

殘年旅夜朗雙鐙
隨衆趨瞻懍夙興
肘印尙虛千石祿
頭銜仍襲一條冰
驄乘此日應非馬
鳩感春風不是鷹
笥裏朝衣親檢點
舊痕猶認五雲蒸

賀子芳舅梁蔚鄉甥同赴青州先約以詩

姻婭都成瑣瑣嗟渭陽一脈赴官衙踵門早謝三千客
舉火深慚五百家賃廡甥猶耽紙筆乞湖舅欲老烟霞
生平吏隱知心久冷暑寒銜願莫奢

悼舊僕彭貴瘵歿省寓

春明貧宦僕無多投我三年耐折磨買菜應門兼數事
凍宵書簿筆猶呵

柔聲常恐慢賓朋僅約能遵苦亦勝盼到主人爲外吏
糧雖未絕病難興

癡心那肯返鄉閭不到衙齋恨有餘奉檄太遲呼負負

蓋棺三日我登車

家書先發汝兄來歸櫬迢迢楚水隈
喚作老彭偏早死善治生惜不多財

正月八日赴任途中嚴冷特甚

春首赴熱官鋒車走飛電那料寒酸緣所至有餘戀冬
令尚行時積雪明素練是歲海大風猛於射羽箭忽興
凜冽威絕少陽和驗結塊曾不舒涼氣喉頻噤傲骨強
支持默把同行念小兒號可憐老人咳未斂僮僕瑟縮
鴉騶卒呢喃燕頰下挂有冰腹中挂無飯向晚馬亦瘡
自奔舊時店沽酒燒溼薪浮白不勞勸笑我本寒人又

加一番鍊攬鏡照塵容真成冷鐵面

十二日接青州府印

太守章爭引綬看我仍對客若無官須防臥內符能竊

舊鎖臺中紐自蟠

掌福建道印交卷歷收存外官訟庭設箱寶藏內室備位耻同

齊塢贅賞功幾被楚王刑畫疆千里皆吾責莫負從前
獬廌冠

迎春

彩旆翩翩映碧岑東郊人語動歡音一官何計安黎庶
萬衆爭看說翰林地脈方蘇民尚困春風未到我先臨
拈香切祝豐年屢青帝還應默佑深

上元後一夕巡夜

災餘坊市類荒騰誰積金錢尙買鐙官去空城偏恃陋
同城官俗器鄙事轉爭能四隅周走催單騎半夜禁寒
多赴省笑凍蠅歸對月輪清不寐恐無新政挽衰徵

十八日移至署登范公臺

臺在署內東院

當年窮塞主此日有高臺憂樂滿天下孤寒一秀才腹
甘齏粥淡曾倚甲兵開西望山相近

鄉平縣山中
有公讀書臺

同茲

弔古哀

哭賀子芳母舅

聯奎

七十餘猶矍鑠翁方看起乘忽長終雄債頓減無多日

寒疾將廖不可風生比耆英歸洛下死愁高士葬吳中
平心我亦何無忌忍使他鄉作殯宮

去冬舊疾未發頗
自喜春寒遂劇以

不得歸
葬爲念

性情伉直氣粗豪小吏蠻荒困所遭殺賊竟償投筆願

棄官忽作閉門高

署粵西令屢破賊
以忤上司辭官歸

案留絕世通神畫

善畫
蘭竹

壁挂鋤奸帶血刀

貢生劉大鼎倡
亂公手刃其頰

痛惜大雷書早

寄慈闈歡笑變悲號

交代

一番交代亂縈絲閣閣蛙聲總爲私帆互往來風順逆
弦分上下月盈虧官箴本誠雞豚察時派偏矜鷓蚌持

同把太倉紅粟蠹侏儒常飽朔常飢

捐賧得獎花翎弟亦與焉詩以自勉兼勗笙堂

濯纓纔看換華簪一羽凌霄喜又臨落帽孟嘉狂態滅
輸財卜式受恩深迴殊聚鵠爲身累略似雄雞見聖心
北海當年賢太守未聞孔雀是家禽

彈冠有弟慶相同恰稱冰銜五品崇

弟並捐同知銜

翠羽笑人

艱一第黑頭望汝作三公才疏鵲翼歌新什時至鴻毛
遇順風歸伏田園須自晦駿驥著後是英雄

賞功戰陣與圍場曠典榮頒本異常盛世預防鴻集澤
微賞僅比鶴分糧何期錫寵容鼉戴難得聯輝到雁行

顯影憐他文采麗願爲鳴鳳共朝陽

送內子還光州迎母就養並省其老父於南城筆
堂弟蔚卿甥偕歸

迎接高年婦遠征卸裝未久又登程暫拋燕寢齊眉按
補作鱸鄉洗手羹素乳兒教妾代養歸心甥與舅偕行
治平勲業從何起家法先須合至情

若翁貧士八旬餘望女情懷諒未舒此去爲增疏傅宅
得閒或授伏生書誼慚舉火周三黨路阻乘舟仗一車
吾弟關河奔走慣定能穩護老親輿

庖人還里連日食蔬僕左費以肉餉諭止之

世多陽虎善蒸豚饋遺從來耻及門今日法行當自近
須知主義勝酬恩

瘡痍滿目歲頻饑只有官庖肉尚肥鄙未遠謀真自愧
盤飧置壁更防微

誰思苦節總回甘齧菜根方百事堪轉憶無官爲客日
豬肝一片已嫌貪

署內隙地闢爲蔬圃

作吏惜分陰奚暇爲老圃何哉地一區躬自督童豎李
效王戎鑽筍貪文同煮即令業極精於政究何補拔葵
古風微置薤強宗侮荒蕪不即治熟視反無覩軒冕務

田園弊仍等越俎庸知寄託股聽吾談肺腑官事尚精
勤餘閒慰勞苦學固賴息游仕當快仰俯登山靈運豪
調水東坡主花縣春既佳醉翁酒能賂無非暢此情煩
悶曾盡吐靜慮得相因化民斯善處區區不予昇感感
騁靡所種菜我閉門費輕事易舉時至卉怒生鬱久膏
彌普窪突燥溼肥瓜壺韭茄苴耕耨播灌疏耒耜鎌筐
筥寓目悅菁蔥適口耐含咀全家案上餐竟日宮中取
憶昔幼趨庭先公職丞簿西江飲水清到處課蔬譜在
官少游民放衙無曠土今日悟遺規直戒華靡教子
知艱難勸農驗晴雨四境歲儉豐不出吾堂庶時復享

良朋三九數如庾園小踏無羊座高揮有麴故鄉松菊
存莫遽希解組

丙子奉母及笙堂弟眷屬至署

板輿緩度我揚鞭宛似童時傍膝前離別愁先銷眼底
飢寒累不到身邊案羅酒食燒官燭券折舟車費俸錢
喜聽民間相告語使君母若始衰年

慈顏入境便歡怡訪得官聲少貶辭廉吏傳家餘治譜

幼孫繞座快含飴

予生三子
母均初見

計程風景從頭問滿屋鄉

音側耳知猛憶趨庭椿影謝順心時即慟心時

果然健婦耐勤勞便異鬚眉亦足豪千里往來忘路遠

兩家定省慰年高牛衣回首車同挽象服榮身日尚操
逾歲嬌兒離累月投懷嬉笑不號咷

吹簾昨歲續絃新任此官衙有夙因

弟婦鄭之兄投親高氏早年寓青州

郡世祿不多同爨弟持家又一織縑人小娃隨姊儀文

肅猶子如兒笑語親

姪鎬及兩姪女偕來

妙景長安期望久護堂

和氣好於春

笙堂就園內破廟略加修葺爲書室

香燕金狔容止雅座揮玉麈笑談清世矜華屋營三窟
汝愛荒園守一槩講學固當嘗舉業讀書方不負科名
化鵬養就扶搖翮坐看南溟九萬程

草亭望見城外村莊

登臨東眺遠時一息塵勞萬樹因城矮孤亭借阜高前
人工結構偏地限周遭喜觀禾稼青青徧九皋

喜雨

麥刈平疇雨腳連歡聲直達郡齋前彼天不惜霖三日
此地曾經旱兩年我亦有亭堪志喜民還無袴正耕田
下車何事能留惠只覺祈豐意向虔

窺園

一徑衝泥滑無妨屐齒停霞光偎樹紫山色隔城青雨
透新蔬圃風穿舊草亭歸來呼晚飯已覺野烟暝

晤賀小芳表弟 蔭

麻衣如雪淚成冰，苦塊餘生絕可矜。得祿有時親不逮，

儲書無地客何能。

小芳供事差滿時以知縣待選

麥舟但稱家財助花

縣，休勞歲幣增。

予爲母舅具歸櫬資小芳重息乞貸止之

此去津沽千里路

靈幃旅館黯寒銜。

苦雨

忽教喜雨變淫霖，水沒苔垣一尺深。半夜馬鬣三十滴，

無家空費衛公心。

浩渺洪波已壞陂，秋禾萬頃舞蛟螭。龍泉欲向天闔借，

爲救蒼生斬雨師。

笙堂將赴汴應試

擇日驅車走大梁
決科依舊氣飛揚
勞心楮葉三年刻
屈指槐花五度忙
古有奇才先器識
世無真賞到文章
夷門是我頻遊路
努力秋風古戰場

里下馬

膏我車兮將適野
持符齊呼里下馬
云是益都民常供
五尾惟防或誤寫
一匹揚言十乘需
狐媚慣將虎威假
淮折即索雇緡多
吏呼震怒誰能惹
各沾餘潤胭脂膏
十六隸驅十六社
我爲貨主毋乃愚
手奪其符不爲下
嚴詰此弊將安窮
吏亦如民吞聲啞
殿中兩騎可馳驅

行李蕭然僕從寡吾生道長能急裝用里下馬胡爲者

博山勘災行

孝婦河中吼聲起大風捲水奔夜裏誰向河濱結屋居
百有餘人同日死遠阜驚呼救不得屍逐浪如離弦矢
涉波來觀裂五中激湍競流怒未已沿村一一親拊循
斷瓦頽垣路旁委居高馭下勢最便臨澗成村岸終圯
田中禾稼胡青青水過不停未遭毀田主旣死無人餐
生者哀啼將他徙含悲我爲父老言以壑爲突有至理
奈何百年狃其常陵谷變遷孰敢擬此災書筴告子孫
移住高原善擇里杜預碑自沈水中知章馬毋落井底

博境諸山遠景絕佳張令請往遊辭之

丹崖翠嶂抱樓臺僻地翻將異境開
靈運游招山賊誚華陰令慕謫仙才
眼看此處宜題句心痛斯行是勘災
他日政成腰腳健或能蠟屐待重來

自省回青遇笙堂於張店

連朝衣製雨猶淋塗過同懷喜不禁
我正歸來汝還去一條泥路沒車深

奉命真將歲七奔歸田誓埽利名昏
對牀一月蕭蕭雨高臥茅廬不出門

憶從十歲客長安小阮生成骨相寒
料汝風塵游亦倦

又攜孺子試艱難

鎬姪
隨行

梁園詞賦重鄒枚
藻榜風雲起茂才
片刻傾談揮手別
重陽後盼捷音來

感事

文法偏思強不齊
飛書有意巧相詆
含生何苦牛牽鼻
到死能甘麝抱臍
忌我才方銷骨毀
媚人術竟捧心啼
羨他黃鵠摩天去
那管紛爭鷺與雞

何期蜚語作先容
媒孽頻搖浩蕩胸
北野馬羣悲伯樂
南蠻馱舌託神農
請君入甕虞張括
與子同袍試及鋒
終感雪霜如雨露
幾番磨鍊後彫松

再至博山勘災

又經大水例書災已熟秋禾付劫灰指點青山如赤壁
露橫霜降兩回來

深谿曲瀨石崢嶸單騎衝泥黑夜行五馬多年從未到
前番父老又來迎

赴省詠章邱驛柳

終年官道拂絲忙淒絕西風作峭涼頂上一層黃落半
矮枝猶綠不知霜

觀衙役習技藝

三冬講武令初申礪爪磨牙虎自馴縱遇豐年難弛備

要防渤海帶牛人

捐級得請兩代二品封典喜賦

五色雲中制誥垂微忱喜極涕漣瀉黃泉欠此陳情表
丹詔榮於述德詩懿行未彰知有待重闈相見慟無期
廣平追憶含飴處珍愛桐孫第一枝

萬卷藏書手澤留馨宗俎豆感春秋五花寵自天邊至

一葉清堪地下酬

誥中有鄉賢語

橋梓木名家教肅珊瑚冠貴

國恩優謹言慎行曾傳誠直到焚黃念不休

朝廷召對暮年詢俯念微臣有老親燕寢今猶甘縹緲
鸞章幸又煥絲綸起居八座安閒地報答三春喜懼身

轉瞬壽筵冬日永殊榮新錫太夫人

母壽演劇宴客得十絕句

獻壽尊從北海開冠裳濟濟快追陪笙歌兩部喧闐裏
我亦牽衣學老萊

消寒時節敞賓筵那料冬宵煖似棉天意恐防人盛會
先移風雪灞橋邊

燈光璀璨月華清照出霓裳分外明恰喜今年親更健
連宵聽曲到三更

彩觴錦幃衆賓歡洗盡貧儒舊態酸記得故鄉當日
慈幃手製菜登盤

京都聲調最鏗鏘游燕頻逢作戲場
奏技老伶驚一顧
方知太守是周郎

都護從官滿座貂健兒行炙氣喧
器主人豪飲雄談處
嚇得牙兵不敢驕

寅寮雅興徵歌舞兒女歡聲說古今
鑼鼓忽停紅燭盡
夜窗判牘月來尋

米鹽節縮善持家老母辛勤幾倍加
七十二年開笑口
又呼兒輩戒奢華

金尊檀板脩經旬竭力承歡仗俸銀
望子成名陶侃母
當年截髮亦留賓

家門漸盛懷斯時吾弟還鄉尙未知膝下稱觴餘隻影
寒更默誦棣華詩

臘八日性田副帥送粥賦答

自從熬粥重

天家虎帳頒來味總嘉奉母一甌兼飽煖不知門外雪
飛花

試院勗應課諸生

風檐都待有司明教養無成愧此行不負科名憑夙願
能先器識望諸生飛騰豈碍鸞棲棘得失何關鹿食苹
我尙寒窗共甘苦大家努力報昇平

東山長李仲璠瑜明府

交誼文章忽一年論心幾度列華筵龍門聲價人爭羨

鳧舄風流吏亦仙

時方筮仕東省

海色蒼茫開講席杏花絢爛

理征鞭

明春赴禮闈

吾宗道氣君能振爲想春波早黯然

訪李仲璠於松林書院用勗諸生前韻

落木寒郊夕照明翠陰招我又行行講堂屢到途初熟

吟社重聯韻恐生

君約余建吟社

雪裏清談慚李及海濱詩派

溯王莽四松亭上方凝眺無限遙峯一抹平

近始游四松亭前此

未暇及也

己卯除夕

今夕團圓聚一門多年負此好晨昏味凝椒實香飛爵
響爆松枝火滿盆薄宦將成花結果故園猶待葉歸根
祇愁雁影天邊渺翦燭橫經落木村

荃堂留讀
鄭氏廟中

庚辰正月初旬大雪

中秋雨罷一冬乾二麥苗枯得雪難盼到歲終幾絕望
飛來春首忽騰歡平鋪樓閣痕鉤白密灑旌旗影拂丹
須識天公有深意祥霽壓倒海波瀾

諸生和詩頗多喜疊前韻

豐年雪片照筵明問字堂開載酒行詩派同聲刪僞體
盛朝勸學重經生頰宮舊典昭鸞藻倚席新歡兆鹿苹

試指雲門喻文理只宜奇崛不宜平

邀李仲璠梁紫垣

錦奎

徐子怡

致倫

三孝廉福介

竹懋筆政作試帖課於槐陰堂

敢誇牛耳主騷壇尚戀書生結習酸賢士偕來開夏屋
諸君持此上春官八叉手亦談何易三折肱仍字未安
各抱文章華國器甲科轉瞬拔孤寒

脈脈詩情靜不譁分排小硯傍窗紗喜逢繡虎三詞客
又得從龍一世家

介竹簫
隸滿洲

老樹年深音啟瑞春風座煖

筆生花山城此會殊難遇屢爲聯吟早放衙

堂前古槐作歌張之

老槐蒼莽覆高閣疑服仙人不死藥何時裂腹樹中分
一半生機尙自若卽今得半氣輪困南柯獨伸龍臂攬
上有密葉千青霄下有垂枝張翠幕故老傳聞不計年
自有此州根遂託日久羣驚有物憑人過其下孰敢謔
烟雲百丈勢冥冥香火一龕靈灼灼風來飛舞厚將崩
昔人已鑄鐵絙縛我到更增一木支豈惟老物傷搖落
千百年亦重留貽十三賢或經摸索守吏雖無齊令嚴
得人差免魯邦削政餘頗愛此扶疎視作鼎彝慰寂寞
廣蔭真看可蔽牛通神果少來棲雀化身癡想作槐安
古而無死何如樂

至馮文毅公故第觀園中奇石歌

昔官京師訪公堂額題萬柳秋淒涼遺址一堆瓦礫場
傳說盛事流芬芳公不自有其林塘館諸徵君卸客裝
一時名士試明光非爲區區陸氏莊茲守青州到公鄉
公早騎箕返天閻宰榜相府字輝煌偶園今尙介其旁
喬木爲薪蔓草荒池水已涸况畫梁惟有怪石鬱青蒼
縱橫突兀槎枒張俯如虎兇氣飛揚仰如鸞鳳凌風翔
下爲幽洞秉燭望聳爲高峯著屐忙秀瘦皺透各露銜
一一奇妙相頡頏頡頡想公臺閣竭贊襄開國盛時飭紀綱
最善相士抗薦章後起人才皆賢良引年林下樂徜徉

十年晚節著梓桑江湖心常戀廟廊相才相度寄託長
輦石羅列爲評量遙向海岱搜微茫一似遺賢訪未詳
徵至俾得列虞颺愛石愛士兩不忘人言娛老得祕方
豈知廣平有別腸我來懷古慕馨香偶抒微論孰與商
惟石知公舊行藏石不能言石自傷點頭森立兩三行
聞梁紫垣改庶吉士李仲璠分發徐子怡大挑均

用知縣喜賦

琴堂經濟玉堂華吉語傳來處處嘉白社聯歡方幾日
青雲直上各專家高吟風月三千首分種河陽一縣花
吾道不孤心喜慰清才那許老煙霞

修西門外泊岸

洋河一勺水夏漲輒奔騰浪挾羣龍鬪城愁百雉崩版

臨波浩渺櫛比石陵嶒那肯民財括微資力尚能

估值百金

獨力捐成

昂軒叔書來云將赴江南寄以遊資並賦

寒士慣離家依人念恐差求名蠅附驥失路鳳隨鴉筆
硯疏生計齋鹽老歲華玉堂貧亦好勉矣策公車

五月初六日郡試

夏日舒長試院開將觀文字復徘徊人欽月旦能評士
我恐風檐易屈才宋代富歐留教化海濱鄒魯待栽培

回頭亦有青衫在曾向潢溪下淚來

量才玉尺憶前因辨別驪黃尚未真益智飽餐重五節

銜枚酣戰六千人

應試六千餘人

闈中最重釐文體局外何從

訪隱淪範我馳驅無詭遇笑看騏驥絕紅塵

性田副帥贈殺賦謝

棘院嚴扃味正清盤飧持贈恰多情款賓精製郇公饌

遺母新調考叔羹

殺送回署供母

聊學煎茶聽唱蚓不忘賭酒

吸長鯨連朝說士甘於肉待爲將軍一快傾

闈中東宗室溥樸齋侍衛

寶

卽索其手製牡丹餅

堆案文書揮不盡打窗風雨亂交加苦從宦海勞人日

欣羨天潢世冑家留客廚香諸葛菜養親盤列牡丹芽
笑余畫餅名無用翻乞餘光富貴花

有老者應試爲示作文法冀得速售以慰其窮

賺得英雄老寒窗苦抱經可憐雙鬢白未博一衿青舉
世稀知己當年悔識丁金鍼吾亦拙聊欲慰伶仃

武試集幼童九人以酒食勞之

髫齡弓馬竟超羣再讀詩書氣必馴選士才將文武備
平原門下不多人

誰將志節勵儒冠鄉曲從無氣鬱蟠愛爾飛騰有奇致
十年磨劍斬樓蘭

禱雨

時屆火西流三農望未酬地憐禾弟槁天讓杞人憂希
澤來何暮祈年大有秋作霖才不易誠向彼蒼求

晚涼

單袷迎風冷不勝碧天如鏡少雲騰憫他滿地秋禾旱
卻盼新涼變鬱蒸

贈性田副帥螃蟹蒲桃

螃蟹縱橫五十輩蒲桃的爍兩三枝遙知天晚開尊暢
雙柏亭前坐雨時

喜雨

檐溜滿城中歡呼四野同雨遲天補過稼茂地貪功糧
價增應減河流斷復通盤飧還食肉小飲愛秋風

性田副帥構四宜草堂成索詩落之

上公甲第峙瀛洲自出承明憶未休樹塞門高終局促
菜香亭復亦風流

菜香亭祀
堂卽故址

一園花抱牆三面四壁書

連屋兩頭不是胸襟超物外那能領略草堂幽

東何吟秋孝廉

清才豔福本難兼年少如卿亦未廉材屬天生終可用
味殊世好復何嫌塵緣羈我書遲著畏友論詩律尚嚴
屈指心交更有幾蛟龍那得久幽潛

氣象崢嶸衆妙兼青萍底事價猶廉疏狂忤世甘無伴
清白傳家苦不嫌幾輩風塵懷磊落三邊烽火令森嚴
萊陽此去鄰東海犀照休容百怪潛

附和作

何家琪

文章風節夙名兼愛士還忘祿米廉當代如公能有
幾私恩縱感不爲嫌杏迴京國三春夢菊奪霜天九
月嚴耆舊吾鄉寥落盡後來重倚拔幽潛

大家重鎮兩城兼文武調和比藺廉民氣自培中國
本政聲早卻遠人嫌漢朝大任三公望洛水宗傳絕
學嚴獨愧疏狂虛志業幸隨規矩就沈潛

赴省長山道中過陳仲子墓有感

豈真治蓋比烹阿骨肉參商果爲何離母甘遭三日餓
避兄專指萬鍾多未能充類全如蚓竟使成名賴有鵝
亞聖不將廉士許肺肝照見論非苛

同時策士盡成蠮巨擘欺人術別操盜跖何堪窮底蘊
匡章幾至信清高尙存未效王家用不殺仍將國法逃
伎倆當年經勘破趙威后亦是英豪

院中諸生拔其尤者十人月課於署

我曾小技悔雕蟲又欲諸生習更工此事何關三不朽
其才俱近二之中橫經授受訛刊豕應舉詞章氣吐虹

倘進竿頭文見道同堂豈復惜磨礱

勘壽光濰縣分界

虞芮有閒田宋鄭有隙地古人讓弗居相傳爲美事生
齒今繁滋山川廣樹藝胡然兩邑閒萬頃斥鹵棄其中
沃壤存絕少田畷至質厥成未聞褐之父常睨視其地
不礱幸其時無稅竊彼犬牙交恃吾鴉嘴利偶作一年
耕果得盈尺穗開墾日以寬稻粱日以積突有雄黠材
旁觀巧相伺葛伯餉爲仇成周禾可致鄭乃愛楚田漢
常拔趙幟次年始防秋治兵相擊刺殺人有主名畫限
無書契烟樓破可撞左券操亦僞奉命來詳觀同行守

土吏衆說何紛紜獨斷斯創議天設新丹河水流不擇
細此亦一鴻溝疆界以爲誌卽作銅柱觀大書石碣字
我毋舍避三爾莫鄙收貳休貪作稼功永革爭桑弊一
畫遂千秋川竭不易位

笙堂至署

撲面黃塵下第歸別來逾歲兩依依孫山盡處科名厄
人海喧時骨肉違村塾共誰同勵志官場如我漸忘機
慈懷倍覺今年喜又一宮袍作舞衣

副帥送臘八粥用上年韻賦答

行廚佳製等仙家臘景連年總拜嘉猛憶防邊諸將士

煮糜海畔斧冰花

時辦海防

正月八日介竹來受業

文章交誼共誰論
問字何來酒一樽
陰欲惜分須閉戶
雪方盈尺恰登門
才名卓磊南皮讌
師道森嚴北面尊
笑我青箱荒落盡
只堪冬學擁鄉村

送何吟秋赴洛陽校官任仍用前韻

除目飛來別緒兼
青氈差幸養雞廉
無聊書且愁中著
有用身休眾裏嫌
安定冷官傳道易
賈生故里選才嚴
鵬程此是扶搖始
不信冥鯤尚久潛

副帥送鼇山鐙至因演劇召客觀之

昇平佳節侍慈闈
竟夕歡聲動四圍
一曲笙歌雲遏響
三更燈火月交輝
縱觀堂下民同樂
轟飲樽前客綏歸
塵海餘閒能有幾
春宵吾亦惜芳菲

鼇駕山來海樣寬
描摹萬象各騰歡
西湖魚網春波膩
北塞駝鈴夜雪團
人物如生機宛轉
星河相近燭高寒
兩城耆老頻來往
不意今年得鉅觀

哭黃香谷內弟

殿荃

高士真成蹈海亡

上年客廣川墮海死

寢門爲位淚淋漓
浪生無知

已心應恨死有尋親志未償

香谷父出遊不知所終

絕代騷才傷

正則一生傲性類文長
浪游故向慈闈報失愛
纔能免

斷腸

臨歿前
數年事

朝衣互著出同車貧賤交情十載餘糧絕獨禁三日餓
囊空屢購百金書通神醫卜韜多藝徹夜聲歌慰索居
磊落奇才無不可亦能續密亦粗疎

天地樊籠擺脫

難儘有詩書堪飽煖只餘
天地是樊籠香谷句

兩番跋涉太

無端華山直削通奇氣粵海橫流縱大觀避世未甘僧
去髮晚年自
號髮僧聯吟常苦客嘔肝幸逢小阮方歸葬丹旌

書哀禮部官

拋殘文稿厭時名卅載寒宵一短檠萬事俱窮惟客死
九原可作尙書生蠻中詩草伶爭唱海上蓮花讖早成

香谷舊句云匣中寶劍終歸水海上黑塞青楓懸落月
蓮花正過天後得其尸於蓮花峯下
定應訪我夢魂行

笙堂攜從堂弟嘉績還光州

彭澤遲歸去田園日就荒更憑誰作主賴有汝還鄉松
菊迎三徑琴尊醉幾場蓬門開不易二仲莫相忘

吾宗小弱弟同至復同歸

嘉績於己卯夏來青

三載期游學雙親

念久違承歡鄉里便墮志子孫徵家塾祖成就誰能悟

昨非

笙堂議定
徵家塾二

彭松岑佐領

詩

贈醬茄報以醃韭並賦

大家都是腐儒餐各擷園蔬贈一盤蹠躩材官應竊笑

書生風味果寒酸

新種庭竹得四絕句

作吏令人俗况是居無竹窗前植數竿照我琴書綠
竹多君子節所至樹先聲頃刻生秋意煩囂氣已清
微雨灑琅玕竿竿翠如洗涼颼飄然來竹亦臨風喜
詩成刻其節字隱翠漫漫眾綠全彫後隨吾詠歲寒

郡試日擬作試帖示諸童生爭相鈔錄至攜原稿
以去戲作

偶然興至作推敲舊學荒蕪恐客嘲多士猶誇臺閣體
不因紙貴輟傳鈔

老馬何能盡識途紅紗障眼久模糊騷情遠遜靈均筆
奪稿翻逢楚大夫

客談海防舊事夜遂夢警報至云賊將逼城某官
已殉難自計無偷生理題絕命詞於壁云節義
文章四十春了然七尺去來身書生莫道無關
繫曾活中州百萬民復念偵探或虛可以無死
因懸畫一軸掩之不欲遠爲人見也醒後以詩
紀之

已拌引決又遂巡頃刻戈矛夢裏身素志甘爲忠義鬼
危機巧試宦游人明知暴骨能無懼雜有名心恐未真

化蝶憑空添閱歷時清幸免戰場塵

新築小臺晚眺

新涼飯罷一登臺
獨對西風倦眼開
檜柏桑槐榆柳棗
四圍萬綠抱秋來

大霧渡洱河

我已行霧中
眼底不見霧
舉首望前途
霧又在遠處
回視白茫茫
迷卻來時路
始知我一身
都被霧裏住
魚游不見水
鳥棲不知樹
人與物不同
當境須早悟

自安邛還見卓家鋪
小溪病涉岸有棄石命輿夫

擬置水中頃刻成梁渡者有喜色因賦

指揮舊石列嶙峋也算乘輿濟水濱不向長官訾小惠
民情最厚是今人

道中書所見

誅茆特地依先隴廬墓終身不自知太息道旁名利客
百年骨肉竟生離

贈別徐煒侯大令

家杰

卽用其海棠書屋集中雨

後渡淄河元韻

治經如治民在心不在境酣適氣或頽艱虞意方靜徐
侯老名宿好學策以敏生性嗜詩書世味付萍梗卅載
宰官身懷才不願騁是如千頃波汪洋測難盡我亦腐

書生郡符慙管領交君快飲醪善氣相與引更讀各體
文峻潔仰高嶺詩奚數八又詞豈矜三影卽以治譜論
亦將升其頂至今益都民不忘飢受拯儒吏而可訾世
胡貴彝鼎自云歷諸艱輒用日三省庸知窮後工古今
同茲幸矧有家學傳諸郎森玉笏

東湖南瀘溪尉胡子韶同學

和鏞

關心離別四千里總角交情三十年我惜湘中羈正則
誰來海上訪成連兩家先德承堂構

其尊人與先君同寅

半世官

箴仗簡編憶否章江同學日陽明祠外月如煙

赴省鄒平道中

又到鄒平路銜山夕照低秋深花有葦水落路無泥守
圃人攜犬穿籬婦喚雞田家風趣好何事尙栖栖

接省信知將調任濟南

齊疆暫駐歲如流絕少才名動上游好語忽驚天外至
行蹤未許海濱留祇緣機廨通雲廨轉似連州易播州
梅小岩河督抵任令兄少岩
守濟南以迴避例調任青州熱不因人當滅火清高愧
對伯鸞儔

從公無短亦無長清夜捫心自較量饋餉軍能知愛敬
經理滿營餉
督軍情尚洽受裁士患不清狂三年民漸安吾拙半世

官宜老此鄉濟上往來冠蓋集將操何術息紛忙

副帥送臘八粥仍用前韻報之

明年今日早移家此味回思定可嘉
南浦春波離緒緩或能畫粥啜桃花

留別青州僚友士民六首

征鞭纔指歷山城爲覩攀轅別緒生
三載治齊慚報政一年借寇感留行
士民擬稟留論止之問心祇覺民風厚
放膽欣

逢宦海平仰眺雲門俯泮水
高深不及此時情

和衷助理總齊年

益都令朱吉甫作樽俎
少梅三在者已六年誼

名將同心

治蹟傳

高炳文揚輔臣兩參戎
周錦坊守戎均投契

司馬勲勞門第舊

廣少
白達

雲峯兩郡貳
皆旗籍世家

參軍俊逸甲科聯

何朱香張錦堂兩
經歷皆癸亥年誼

每依

講席聽經學

李仲璠孝廉梁紫垣庶常先後主講雲門書院

喜得儒官卻俗緣

樊杏橋劉位東范轉哪

三學博能以品學相勵

民食兵糈偕努力集思廣益仗

羣賢

馬麗中大令暨章湯張李劉顧諸君督捕蝗災奎雲亭少尉經理兵米均得力

虎賁英氣劍頻磨廉藺交深意轉和

滿營協佐各官與余莫逆觴詠

相招虛日少盤飧互饋古風多兵情妥帖蝗投火

旗莊

捕將令森嚴馬避禾

甲兵雇馬夫踐民出副帥禁之咸遵約束

幾見屯營民

不擾武侯勲業繼謳歌

十三賢去渺難尋治譜雖傳陋習深臥閣終輪循吏傳

埋輪未改昔年心臨卑勢隔情須達理劇才疏氣每沈

職重親民更親士公堂評卷發長吟

府試及月課終日坐堂卷至親閱

樓臺漫向樂天誇地僻心閒事事嘉識字兒摹文簿草
扶筇毋賞訟庭花亭階石案朝登饌井汲泉源夜煮茶
寒菜滿畦供卒歲衙齋何處不田家

新兼大郡轉踟躕遙想湖山興不孤豈有材能光薦牘

幸邀知遇領名區迎眸縹緲嵩雲近

蘇垣距睢寧較
青少三百餘里

回

首蒼茫海氣羸贈與諸君臨別語各憑清白勵前途

守青三年覆閱故牘覺無一善政足以及民歲暮

頗閒雜詠數事俾異日官斯土者擇焉小惠未

徧且誌吾慚

牧馬

青州千里開芳甸春麥秋禾青蔥徧誰歟衛此繁庶區
駐防營制早創建營內馬羣雲錦張棧豆官錢仰征繕
驍卒不自求牧芻騏驎付之役夫賤役夫得值馬食齋
遂晚平田償奢願始猶踐踏畏民暑繼乃准折獲私獻
道路以目莫敢言野老疲癯官馬健幸哉都護政一新
深燭積弊用威勸叔度來興襦袴歌臨淮至覺旌旗變
小民恃此愛民心聊固吾圉敢飲恨軍民兩安豈不佳
騰槽食土咸稱便孰知令肅卒更驕殺馬於隘民亦煽
一軍皆甲胡爲來捉人幾欲抄瓜蔓牧馬殺馬皆邑民
那用柳營替花縣吾得要領告屬官毋以模稜爲謹愿

杖牧馬人挫其凶釋殺馬人平其怨馬價幾何官代償
補闕仍足備征戰案不可動山可移將軍禁令卽邦憲
大石深刻植縣堂千秋要使軍民見熊羆諒我心無他
怒氣填膺乃三嚙

陷車

古者司空平道塗時雨將降達溝渠兩京來往此通衢
官未及修民不除民不除非力作疏將困行人惟利圖
伏霖十日地爲潛深者病涉淺者淤乃更深以長柄鋤
橋狹僅可容一車撤彼旁石輪蹈虛閒道入可自離姑
預覓老媪臥地呼謂踐其稼損其租地不得行橋又無

咄咄逼人出一途凶至滅頂軌早濡冠裳帶履泥沾汗
大澤竟陷楚王孤中軍已退晉樂書深林黑暗有人狙
貌爲相遇意態徐客從何來集此區危言聳聽故嗟吁
是宜集衆雜牛驢或推或挽輪始扶不腆人各酒一壺
酒資千萬論青蚨姑妄聽之盟不渝始返深林召其徒
遠望川谷青模糊水禽格磔嚇妻孥馬驚還瀟汎水鳥
人歛覆轍聽冰狐烟波蒼莽日已晡衆至言又人人殊
掀公出淖飽所須鞭起局促轅下駒悉索餘利如追逋
納諸罟攫取萑苻非居者智行者愚實逼處此僕先痛
不三四里免守株行路之難有是夫予聞客言急下符

壞道與橋有常辜搜厥渠魁黑索拘安得一一令吹竽
荷校於市四野徂書罪於版視此俘薄人險阻胡爲乎
矧畫陰謀攫其帑彼何困苦此何腴不平則鳴法當誅
豈能禁爾見利趨奈何巧奪竭錙銖民聞斯言不我迂
客還旅舍趣行沽明日官道遂長驅晴風獵獵吹菰蒲

盜牛

老農夜擁老牛臥家倚烏犍爲奇貨寒夢驟醒聲慘呼
牛已無蹤土牆破田家重牛賊盜牛賊中有豪長諸偷
豢養狗盜出門下自詡結客孟嘗傳老農逡巡至其地
乞豪尋牛睫帶淚竊睨牛方繫樹陰屢欲直言恐觸忌

豪云我非逋逃藏要能卜牛在何方但計所值與一半
失物復還如未亡老農不敢價求減翻說高情憐命蹇
還家火速載錢來遲則屠肆餘一鬻豪亦雄談自爲功
爾鄰失牛與爾同場言將至縣城訟齎金來贖物已空
農功益困豪益固蠹役奸胥相依附野老憤極泣陳詞
公堂含笑稱細故豈知椎埋惡少年行將帶犢擾市塵
除暴詰奸有專職肯聽江河始涓涓豪中黠者縛尤急
家世武科一命襲舊依大府作材官兄弟冠纓如鶴立
繩以法律鞭朴威奪其氣馘血肉飛責令禽賊許自效
贖罪亦如贖牛時境內諸偷聞之悚畏我夾袋不遺種

入秦僅得潛蹤，逃守劍未能改過。勇庖丁豈肯善藏刀，我遇鄉農以詞挑田父，亦能世情語。但云好夢酣冬宵。

捕蝗

官司民牧知民性，小害輒避微利殉。利中有害不及知，害中有利尤未信。守青兩載皆中稔，那料今年飛蝗盛。來自東南去無蹤，偶集秋禾羽振振。民間始駭繼歡呼，謂蝗處膏能不潤。或云入海化爲鰕，余戒王伯須遊偵。方過十日告者來，田有遺子蝗先孕。小未生翅難食苗，密如蜂衙如蟻陣。余誓滅此後朝食，遣官四出氣奮迅。自裹餼糧單騎行，惟恐擾民比蝗甚。有蝗人家手無多。

無蝗坐視心相慶豈知蠶食禍終及萬頃黃雲一掃淨
法以協捕爲定衡數十村莊各歸併患難扶持同井親
步伐止齊如牆進或焚或瘞或撲之養成羽翼難再勝
九十九子尙有蝻購以俸錢我無吝錢二百易子一斤
至蕙餘斤無餘賸婦穉聯翩囊橐充山谷窮搜種類罄
丁男捕蝗尙未休遠處攜糧近供飲太守親至相勞苦
扶其惰者日申儆駐防佃戶勉遵循城邑吏胥咸退聽
馳檄飛書手不停六月杪至七月閏蝗蝻無跡禾黍豐
猶慮明春孽爲病蟲不害稼農得錢父老登堂頌新政
告以他時患預防眼前利害非明證見幾略早勇於爲

僚屬和衷民從令民視蟲害如寇仇官以豐年爲性命
退食召客酬勤勞新稻米香溢釜甑

彭松岑佐領園中有憑雲樓請再題額余顏曰澹

澹閒第一樓并賦志別

澹澹相去百餘里二水中間著此樓想首京華雲北面
賞心風月海西頭四時花木藏春氣半日琴尊得近游
園主多情還惜別無多墨迹爲君留

郡署有十三賢堂將行以詩紀之

宋都汴京開宮闕左倚青州爲柱石羣賢先後政績高
或由拔擢或遷謫范富歐陽最昭昭寇準曹瑋亦赫赫

李迪程琳與吳奎趙槩趙抃並龐籍更有劉摯張方平
青久建祠煥金碧誰題堂字十三賢相對雲門一千尺
日坐廳事心肅然亦知才學難爲役每親案牘輒凝思
特恐顯背前賢迹至今靈氣若往來壓倒四松與古柏
四松古柏皆
青州亭名守青三載將有行並此羹牆亦遠隔九原
可作誰與歸我慚從政不及格庸材事後追悔多誓惜
分陰如拱璧

副帥率各官設餞卽席有作

匝月光陰聚幾回頻年游讌屢追陪風雲奇氣歌三疊
湖海豪情酒萬杯名將喜看人痛飲同官翻愛我無才

相期不灑離亭淚香火緣深或再來

和留別詩成帙滿營尤多喜賦

多士高吟訴別衷連營亦復寄郵筒詞章原不分文武
交誼真能貫始終清有客知方覺隘詩無人愛漸稱工
篇篇珠玉新收得莫笑移官橐未豐